



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 7

Nuh ken o: Cong MLA Mamman judicial custody-i yokogo

Pakistan meshitsüyadang India ita tongogo: Nawaz Sharif

VOL. XX NO. 339 (ADOK 339)

DIMAPUR RASEMNÜ (WEDNESDAY)

RONGJUI (SEPTEMBER) 20, 2023

₹ 5.00

Arunachal & Nagaland nung delimitation mapa inyaktüsü

New Delhi, September 19, 2023 (Agencies): Assam sülen Northeast state ana- Arunachal Pradesh aser Nagaland nung delimitation exercise yakta agitsü akok.

Centre sorkari Supreme Court dang Arunachal Pradesh aser Nagaland atema delimitation commission tentetsü tebilemba lir ta shiogo.

Iba osang ya solicitor general Tushar Mehta-i Supreme Court nung three-judge bench dang ashi. Iba bench nung Chief

Justice of India (CJI) DY Chandrachud dena lir.

Supreme Court bench-i Arunachal Pradesh, Manipur aser Nagaland nung delimitation exercises inyaktüsü temepishiba ka angadandang Centre sorkari iba osang metetdaksü.

“Manipur nung tensa mejungi aliba ajanga delimitation exercise tangbo meinyaktüsü saka Centre-i Arunachal Pradesh aser Nagaland atema delimitation commissions tentetsü tebilemba lir” ta Tushar Mehta-i ashi.

Lok Sabha nung Women's Reservation Bill benok

New Delhi, September 19, 2023 (Agencies): Union Law Minister Arjun Ram Meghwal-i September 19 nü ‘Nari Shakti Vandan Adhiniyam’ ta jar Women's Reservation Bill benokogo.

‘Nari Shakti Vandan Adhiniyam’ ajanga Lok Sabha aser state legislative assembly ajak nung tetsür nem 33% lezmüksütsü alizüing lir.

“Linük renlokba maparen nung asenoki tetsür talila dendaksünür” ta Law Minister Meghwal-i ashi.

“Linük nung vote enoktsür nisung million 950 nung tetsür tesadang ka lir saka parnok Parliament nung 15% aser state assembly tem nung 10% shi ka dang lir. Iba bill agizükra Lok Sabha nung tang tetsür MP 82 aliba nungi 181 akümtüsü” ta paisa metetdaksü.

Lok Sabha nung Constitution

(One Hundred and Twenty Eighth Amendment) Bill, 2023 benok.

Iba bill ajanga Rajya Sabha aser Lok Sabha nung tetsürtem shilem tuluba agiba alizüing lir ta Prime Minister Narendra Modi-i ashi.

“Atal Bihari Vajpayee’er sorkar mapang Women's Reservation Bill aiben benok saka Bill agizüksüsa nübo menguteti tembang” ta PM Modi-i ashi.

“Tanü Tsüngremi iba mapa tejakleni bener aotsü atema maongka agütsüogo. Ozü sorkari house anaprong nung tetsürtem indang Bill tasen benoker” ta paisa metetdaksü.

Opposition party temi sorkar dang iba bill benoka agizüksü atema rongshia arur. Deobarnü Congress-i Hyderabad Congress Working Committee senden nung iba atema bangzüng ka renema liasü.

Kaisa Rio-i Naga sobaliba inyaksangshitem ajungkettsü ayongzük

Kohima, September 19, 2023 (TYO): Lanuputui angazüksü atema asenoki sobaliba inyakyim balala inyakterem ajungkettsüla ta Nagaland Chief Minister kinungtsü Kaisa Rio-i ashi.

Directorate of Art & Culture nung ‘Where cotton flowers grow’ documentary film sayuba den Mini Exhibition-sum-Sale sentong nung jembidang “documentary ka yangluba ya temeim mapa ka lir aser iba nung otsü junga bushitsü, bendanga agütsütsü aser tenangzükba takang alitsü nüngdaker” ta Kaisa-i ashi.

“Cinema wadang nung documentary films ya kanga tongtipang lir kechiyong documentary ajanga theatre mesüra screen adena otsü shiteter. Documentary ajanga tangar dang meshii aliba otsütem, tayongzükbatem mesüra tangatetba ashir” ta laisa ashi.

“Noklak district kübok Sanglao yimtsüing nung alirtemi taintem dang nungi meti nungi ang yangluba inyakyim angazükba beshiba atema kanga pelar” ta

Kaisa-isa metetdaksü.

Art & Culture Department-i documentary pusema yariba aser Naga textiles entrepreneurs ajungketba atema laisa tenüngsang agütsü.

‘Where cotton flowers grow’ documentary film ya Khiamniungan tsür pezü-Mouniu, Musim, Jejon aser Jukhing nung dak rangloker yangluba lir ta Art & Culture Commissioner & Secretary Athel O. Lotha-i ashi.

Iba documentary ya Exotic Echo Society-i ketdangsia inyak aser TakeOne Production House-i produce asü. Department of Art & Culture-ia senotsü teyari agütsü aser Noklak District administration ajanga logistical support agütsü.

Tanü Kaisa Rio-isa State Museum nung anogo asemnü exhibition-cum-sale lapoktsü. Iba ya Exotic Echo Club, Chizami Weaves, Khiamniungan Menyiu Hoikam, Kohima aser Meluri village nungi Kürütsechu Cotton group ajanga lapokba lir.

Advisor Hekani Jakhalu-i NE rongsenketzüng renloktsü ayongzük

Dimapur, September 19, 2023 (DPRO): September 19, 2023 nü mezüingbuba Northeastern States Chamber of Commerce and Industry Business Conclave (NSCCI) business session nung Department of Industries Advisor Hekani Jakhalu-i alakteta jaoker ka ama shilem agi.

“Asenoki ‘Seven Sisters’ ta ajaba Northeastern states rongsenketzüng renloktsü merangtsüla. Northeast nung nisung temeyoktep lir saka asenok state ajaki rongsenketzüng renloktsü aser azükarua alitsü külem taginüba lir. Anungji asenok külemi aser kati ka yaritepa tejakleni aotsüla” ta Hekani Jakhalu-i o jembidang ashi.

Northeast rongsenketzüng aintsü aser terenlok alitsü atema tashi, ali rongsen aser maongka

aika lir saka asenoki itemji mamshir. Asenoki infrastructure renloktsüba dang masü saka nübortem dang technical skills sayutsü nüngdaker, ta lai ashi.

“Northeast nung Micro, Small, and Medium Enterprises (MSMEs) ajanga shilem tulu agir. India nung MSMEs nungi Northeast nung 1.5% dang lir saka employment, output aser exports nung 62% tashi agütsür. Anungji asenoki MSMEs nung temulung agütsütsüla” ta Hekani-isa ashi.

“Küm pungu tejaklen ‘Made in NorthEast’ sayaba ajanga tesentaktep akangshitetsü aser inter-state o international trade ajanga regional economy ajungkettsü” ta laisa metetdaksü.

North East Industrial and Investment Promotion Policy

2007 kübok Northeast nung investment share ajema kümogo anungji asenoki industrial policy tasen ka yanglutsüla, ta laisa shisem.

“Northeast nung agriculture aser indigenous horticulture products renlokdahtsütsü atema agency balaka nüngdaker. Ano, MSMEs nem sen tetemlok tajemba agi sen aputsütsü atema North East Entrepreneurs Development Scheme kübok budget teimba lezmüksütsüla” ta Hekani-isa ashi.

“Northeastern States Chamber of Commerce and Industry-i iba conclave ayongzükba atema pelar aser iba sentong nung shilem agirtemi külem mangdang asangsang nung ataloktsüsa külemi mapa inyaktüsü ayongzükür” ta Advisor Hekani-isa ashi.

Dimapur nung Dengue wara ulura kümogo Tzümetsüing azüoktsü atema mapa balala inyaktüsü



September 19, 2023 nü Dimapur DPDB senden nung Advisor aser DPDB Dimapur Chairman Moatoshi Longkumer-i o jembidang agiba noksa ka angur.

Dimapur, September 19, 2023 (DPRO): District Planning and Development Board (DPDB) senden nung Dimapur district nung Dengue kanga putetba aser tzümetsüing timtem atema tebilemtsü benoka lemsatepogo. Mongulbarnü Labour and Employment & Skill Development, Excise Advisor aser DPDB Chairman Moatoshi Longkumer lenisüba kübok DPDB senden amendang Health department nem dang khuret magütsüi nisung ajaki Dengue tashidak azüoktsü atema inyaktüsü bangjemtepogo.

Senden nung Advisor Moatoshi aser Advisor Hekani Jakhalu nati merla azüoktsü atema tangsa mapa kar inyaktüsü ashi.

Iba dak sendakba nung Dimapur Deputy Commissioner, Medical Superintendent (MS) aser medical department dang Dimapur district kübok Council züingsemtem aser tesayur ajak den senden ka amentsü mapa lezmüksütsüogo.

Külen azü peria manguba

atema DPDB züingemtemi Honibarnü blood donation drive ka agitsü aser iba atema MS Dimapur nem ketdangsurtem den tongteptsü mapa lezmüksütsü.

Dimapur district nung blood separater ka kanga nüngdakba atema Advisor Moatoshi aser Advisor Hekani nati bangdakpurtem den iba khuret lemsateptsü senden nung lemtet. “Dengue ya wara tulu ka kümogo. Iba atema District Task Force-i awareness meeting ka agiogo aser tang door to door campaign ka agidar” ta MS Dimapur Dr. Kavito-i ashi.

Dengue wara azüoktsü atema loktii shilem agitsüla anungji Dimapur nung aliba sensotemi yariteptsü ayongzükür. Loktii shilem magira merla azüoktsüba mapa nung timtem kanga ajurutsü, ta pai ashi.

Dimapur nung tzümetsüing timtem atema jembidang Dimapur Revenue Officer (RO)-i field report ajanga tesem 29 nung temulung agütsütsü bushitetba osang lemsatep.

Tesem 29 nungi tesem 13

nung eviction asütsüla kechiyong kiojen yangluba ajanga kilentzü ayimdak timtem ajurur ta RO-i ashi.

Dimapur nung tzümetsüing timtem ajema kümdaktsütsü atema kilentzü ayimdak tangbanga aliba lapoktsüla, culverts ulushitsüla aser ali atsünga agirtem agientsüla, ta Dimapur RO-isa metetdaksü.

Iba dak sendakba nung DPDB-i Dimapur DC aser RO na dang list ka adoktsü aser drainage systems nokdangba kiojentem agientsü sangdong agütsütsü mapa lezmüksütsü.

Dimapur ya shishilembadak tongti tesem ka lir anungji shishilembabaren nung monopolise mesüdaktsütsüla ta Advisor Moatoshi-i ashi.

DPDB senden nungsa dokantem nung aser Dimapur temeket nung CCTVs enoktsüba maparen meyipa reprangshi. DCP Dimapur-i iba dak sendakba osang lemsatep aser DPDB Dimapur Chairman-i bangdakpur dangi abentsü atema detailed project report meshi.

Mokokchung District Planning & Development Board senden menogo



Advisor, Water Resources Govt. of Nagaland aser Chairman, Mokokchung DPDB, Tongpang Ozukum-i September 19, 2023 nü Mokokchung Circle Ao Officers Telongjem den senden ka ADC Planning Conference Hall, Mokokchung nung ayongzüka mena liasü.

Dimapur, Rongjui/Sept. 19 (TYO): September ita atema Mokokchung District Planning & Development Board (DPDB) senden Deputy Commissioner, Mokokchung indang Conference Hall nung September 19, 2023 nü Advisor, Water Resources, Tongpang Ozukum lenisüba kübok mena liasü.

Taoba senden nung Nagaland Chief Minister agizüksü aser tang aliba NST office ISBT Yimyu-i bener aitsüba indang jembiba maneni iba senden nung lepa reprangshia liasü. Mokokchung

Law College ya Government aided college kumdaक्सütsü onük benokba, Mangkusong Government Primary School Ungma nungi Sademmeren Government Primary School, Ungma dangi melentsüba application benokba sorkar dangi yoktsü lemteta liasü.

Kasa senden nung society tasen - Sungratsu Army Association, Sungratsu Village; Likum Welfare Society, Salangtem Ward, Mokokchung registration agitsü aser Moria Mission Jubilee School, Longsa recognition atema application agüja aliba

jembia liasü.

Iba senden nung Chief Medical Officer aser District Agriculture Office ajanga department inyakyim osang agüja liasü. Senden nung maneni Department balala indang ken o kar jembi.

Senden nung mendenpubai state nung temesepba mozü amshir tali akumba tebilemsü lemsatap aser itemji meteta alitsü ayongzüka.

Maneni taruba senden nung PWD (Road & Bridges) aser Fisheries Department dang par department inyaksangshi osang agütsütsü nungloksü.

23 Impur AC NDPP ketdangpur tasen shimogo

Dimapur, Rongjui/Sept. 19 (TYO): 23 Impur AC nung NDPP ketdangpur tasen shima mapa nung aniokba sentong ka Kubolong nung September 19, 2023 nü agi, kong Advisor, Law & Justice, Land Revenue, TN Mannen IAS (Retd.) dena liasü.

Iba sentong nung Advisor TN Mannen-i jembidang ketdangpur tasen shima alirtem den tepela lemsatap aser parnok lenisüba kübok terenlok alitsü aser Impur area nung party temaba jenjangi ajungkettsü imlaba lemsatapa

liasü. Pai party lenirtem dang party politics nung sapanga meyui yimdam yimtsüing nun goa sorkar indang scheme balala nüburtem nem angatetdaksütsü ayongzüka liasü.

Mangyangnungba, President, NDPP Mkg Region ajanga iba sentong nung tir o jembi aser 23 Impur AC nung NDPP lenirtem tezüngzüktep agia liasü.

Iba sentong nung N. Shilu Imchen, Vice President, NDPP Mkg Region ajanga tarur pela

agizükba o jembi aser ano Arenla Pongen, President, Women Org. NDPP Mkg Region; Bendang Walling, President, Youth Org. NDPP Mkg Region; Imsunungsang, President, Agri & Allied Org. NDPP Mkg Region; Moa Lemtur, President, 23 Impur A/C nungeria o tatsütsü jembi aser Sentila, President, Women Org. 23 Impur AC ajanga melepzüing o jembi. Iba sentong nung menden L. Temjen Ao, Vice President, NDPP Mkg Region liasü.

Nagaland BJP Lok Sabha Pravas Yojna senden Dimapur nung amen



Dimapur, Rongjui/Sept. 19 (TYO): 2024 Lok Sabha election asoshi Ato Kilonser Narendra Modi tashi itshitsü atema Lok Sabha Pravas Yojana (LSPY) Core Committee, BJP Nagaland senden Tourist Lodge, Dimapur nung September 19, 2023 nü mena liasü.

2047 tashinung linük ya 'developed nation' ka akumtsü asosi PM Modi-i linük tejakleni tasü ita anir aoba nung shilem ka ama Delhi nung September

19, 2023 nü nungi tenzüka Parliament tasenba nung mezüing parliamentary session amenba asoshi tepela lemsatapa liasü, ta sangdong ka ajanga ashi.

BJP National president J.P. Nadda lenisüba kübok Nagaland State BJP-ia tongtipang mera aika tekeraba nung agia Nagaland ya developed state ka kumdaक्सü, ta ashi.

Iba senden nung Nagaland State BJP President Temjen

Imna Along aser National Leaders & Cluster in Charges of LSPY, NE Sambit Patra & Avinash Koli nungertem dena liasü.

State Convenor Hurui Zeliang kübok LSPY Committee ajanga state level Core Committee & Senior Members' Committee indang tenüngtem reprangshia liasü, koba Modi sorkari trenlok maparen balala inyakba indang Nagaland nung nüburtem nem angatetdaksütsü asoshi shimba lir.

Iba sentong nung Tsüingrem temoatsü jazüka Dr. Temsuwati Longkumer-i sarasadem aser Thsangse Sangtam-i tawa national aser state level senden balala amenba osang agüja liasü.

Iba senden nung Khongwang Konyak, Therali Ezung, Kashito Kiba, Tsachola Rothrong, Kumari Melandialiu Nbung, Mhonymo Kikon, Ajay Sethi & Pouhiamlung Gangmei nungertem aden, ta sangdong ajangasa ashi.

Kohima nung Mini Exhibition-cum-Sale sentong agi

Kohima, Rongjui/Sept. 19 (TYO): Directorate of Art & Culture, Kohima nung Documentary Film 'Where Cotton Flowers Grow' sayuba aser Mini Exhibition-cum-Sale sentong ka September 19, 2023 nü Nagaland Chief Minister kinungtsü Kaisa Rio-i semzükja liasü.

Kaisa Rio-i iba sentong nung jembidang, kumpa ya akhi mapang nungi kanga tongtipang süa amshia aruba oset ka lir aser tanü tashi amshir, ta ashi.

Naga textiles entrepreneurs tem yaria, ajungshia aser temaba jenjangi ajungketa sapang agütsüba atema lai Department dang pelaba lemsatapa liasü.

Commissioner & Secretary, Art & Culture, Athel O. Lotha, IAS ajanga ashiba agi, Naga nung temi art aser crafts ya akhi mapang nungi amshia aru. Akhi mapang nungi amshiba yimyatem, talisa kumpa tsünüa ang ainba, sü atakba aser sentsü balala nung aremba amala samaa taor, ta lai ashi.

Tesem tezülen nisung tain kari dang akhi yimya nung ang aina sü ataker, ta lai ashi.


Iba mini exhibition cum sale nungya 'indigenous textiles and crafts' kanga bolua mangubattem sayur aser ano ola-angla mapa inyakerkem sempet sayur.

Documentary Film sayuba aser mini exhibition cum sale aliba ajanga asen sobaliba tajung wazüka ayutsü asoshi awareness agütsütsü, ta Athel-i ashi.

Take One Production House nungi Sesino Yhoshu-i ashiba agi, documentary film 'Where Cotton Flowers Grow' ya Noklak district kübok Sanglao yimtsüing nung Khamniungan tsür pezü dak rangloker yanglu, shirnoki tanü tashi iba ola-angla mapa inyaker.

Iba Documentary Film ya Exotic Echo Society-i asateta Take One Production House ajanga yanglu aser Department of Art & Culture ajanga senotsü nung yari aser Noklak District Administration ajanga logistic nung yaria liasü.

Mokokchung Police-i mim mozü amshir ana apu



nunger Limawapang jabaso arishi kum 20 tain Moarenba ket nung Brown Sugar 1.19 gram shi bener lia apu. Iba sülen asüngdangya süa lahdanger kelen Mokokchung Police-isa Yimyu Ward Mokokchung nung alir Khensa nunger Imnalemba kidangi oagi bushitsüngdangba mapang nung Imnalemba jabaso arishi kum 33 tain Takayapang meyong Brown Sugar 10.35 gram shi ngutet.

Iba tatalokba maparen dak sentakba nung Mokokchung Police-I Mokokchung Police Station-2 nung aibelenertem ya puoker ozüing dak ajemdaker bushitsüngdang südagita Additional Superintendent of Police Mokokchung ajanga sangdong ka nung metetdaksüogo.

GITI Kohima nung 2nd Convocation sentong agiogo

Dimapur, Rongjui/Sept. 19 (TYO): Government Industrial Training Institute (GITI), Kohima pur 2nd Convocation sentong September 19, 2023 nü GITI Complex nung aliba Drawing Hall nung agia liasü.

Iba sentong nung tesemdanger tongti ka ama Additional Secretary & Ex-Officio Director of Employment, Skill & Entrepreneurship, Kovi Meyase dena liasü.

Iba sentong nung Kovi Meyase-i takok angurtem den tepela lemsatap aser parnoki alizüing tongtetba asoshi nüma tanga bilemsü ashi aser mapa angutsü asoshi ochishia aser meranga inyaksü tongtipang lir ta ashi.

State nung lanurtem mapa mangur taoksatsüka akumba indang jembidang, April 2023 tashinung Nagaland nung mapa mangur lanur 70,000 lir, koba linük nung jenjang pezübuba alitsü, ta Meyase-i ashi.

Pai graduate asürtem dang sorkar mapa kisüing mebushitsü ajungshi aser wadang balala nung tetsüing ajemoka aser mapa bushiba nung temolung ajema malitsü ayongzüka liasü.

Nenoki teyakyak mera agia maparen balala meinyakra tang tashinung angazüka aliba ya kaket

nung dang alitsü, ta pai ashi.

Iba institute nungi takok angur shilem 98 ajungba atema Meyase-i GITI Kohima indang principal aser staff tem nema tenüngsang agüja liasü.

GITI Kohima indang principal, Er. Enchiba Longkumer-i tarur pela agizükba o jembi liasü aser ano kaketshir temi pei courses takok ngua renemba atema tenüngsang agütsü aser tesayur temi bendanga agütsür senso tajung anitetba asoshia pelaba lemsatapa liasü.

Longkumer-i ano trades balala nung dangar dak nungi alakteta takok anguba asoshi tenüngsang agüja liasü. Item rongnung Redeem Mahg-i Carpenter trade nung marks shilem 85.67 angu, Liche Kupa-i Mechanic Diesel trade nung marks shilem 85 angu, Chumbenthung-i Plumber trade nung shilem 89.60 ngua liasü.

Iba sentong Seyiekhrienuo aser Kezhangunuo na lenisüba nung agi, kong tesayur Lhouncilie Latsu-ia o tatsüka jembi, Nuhulu Rhakho-i ken ka aten.

Maneni Khedi Bapstic Church nungi Dr. Ruokuovilie Sachu-i kaketshirtem asoshi sarasademtsü, Kesalhoukho Casavi-i tepela o jembi aser Liche Kupa-i melepzüing o jembi liasü.

India-i Canada nunger Diplomat ka mintok

New Delhi, Rongjui/September 19 (Agencies): Canada Ato Kilonser Justin Trudeau-i, pro-Khalistan lenir Hardeep Singh Nijjar tepsetba nung bendanger tashi densema liasü ta ashiba den India nunger diplomat ka mintokba sülen India-ia Canada nunger diplomat tejen ka mintokogo. Hardeep Singh Nijjar ya Khalistan Tiger Force kiralongrar telok tekolak liasü.

Khalitsani kiralongrar ka asüba dak sendakba nung India aser Canada na mangatettep adoker aliba mapang ka nung India dangi High Commissioner Cameron MacKay, Mongolbarnü New Delhi nung MEA headquarters-i jaok aser Canada nunger diplomat ka mintokba indang pa nem osang agüja liasü.

Diplomate dang ya anogo pongu tsüngda India toktsür aotsü asoshi tetuyuba agütsüogo, ta source-i ashi.

MEA-i sangdong ka ajanga ashiba agi, India telung ken o nung Canada nunger diplomat temi minprongba aser India anema inyaksangshiba nung parnoki shilem agiba dak sendakba nung India sorkari kanga süoki ia agiba iba telemtetba agiba ajanga sayur.

"Canada nunger diplomat ya Canada nung mena aliba ozüing raksar atema inyaker aser target tem densema ken o aika bushisüngdanga jangjashiba nung densema liasü," ta source-i ashi.

MEA sources-isa, lenirsang aitsüba ya ken o kanga tongtibang lir.

Canada tir Justin Trudeau-i Hombarnü ashiba agi, pro-Khalistan lenir Hardeep Singh Nijjar tepsetba nung bendanger tashi densema liasü. Paisa, Nijjar tepsetba nung India sorkar densema liasü ta ashi.

Ministry of external affairs-i Mongolbarnü ashiba agi,

Canada PM-i lemsatepba olen ya tamendakdak maka.

Trudeau-i iba olen lemsatepba sülen ghonda ishika lir Canada-i India nunger diplomat tejen ka mintoka liasü. Canada foreign minister Melanie Joly-i osangbenertem dang ashiba agi, lar sorkari Hardeep Singh Nijjar tepsetba dak sendakba nung India nunger diplomat tejen ka mintokogo.

Nijjar shiba India nung aputsü bushia liasü, pa ya June 18 nü Canada nung British Columbia province kübok Surrey yimti nung gurdwara ka kima khaseta liasü.

Hardeep Singh Nijjar ya tenokdangba agütsür aliba Khalistan Tiger Force (KTF) indang tekolakba liasü aser India-i bushiba kiralongrar tongtitem rongnung densema liasü aser pa atema senpet sen lakh 10 nangzüker lir. Pa ya mejangjaba nisungtemi Surrey nung gurdwara ka kima khaseta liasü.

Nuh ken o: Cong MLA Mamman judicial custody-i yokogo

New Delhi, Rongjui/September 19 (Agencies): Firozpur Jhirka nungi Congress MLA Mamman Khan, shiba Haryana kübok Nuh nung azütokshi lendong adokdaksütsü atema rongmesoba asoshi aitsür liasü, pa Mongolbarnü okadak nokdakogo aser pa anema benoka aliba ken o pezüprongla dak sendakba nung anogo 14 judicial custody nung ayutsü tetuyuba agütsüogo.

Khan okdak nokdaksü aliba ajanga district nung security tali akangshia liasü. Okadaki aoba lenmangi police 200 dak tema yoka liasü.

Pa Hokolbarnü apuba sülen

MLA ya police ket nung anogo pezü tashi yua liasü.

Nuh police-i aija aliba MLA anema ken o pezü tashi benoka lir.

Pa apuba sülen police-i ashiba agi, Nagina tesem nung yatra ka amaksü rongmesor tongtitem rongnung Khan-a ka lir.

Parnoki pa indang phone aser laptop meshia yuogo aser ken o nung aija alirtem den pa ajurutepeba indang kuli kar danga bushitsü atema pa indang social media account tem asadangba mapang ka lir. Ajsüüaka Khan okatsür aser pa pusemertemi ashiba agi, pa iba ken o nung tim mesüi aitsüogo.

Source-i ashiba agi, SIT-i Khan dang ken o ashishiogo. STI-i pa dang ken o balala asüngdangba pai paitoktsü meranga liasü. Police-i court dang ashiba agi, aija alisangi teka amteper inyaksangshi masür aser pai ochi meimshiba den pa indang phone dena format süogo. SIT-isa, MLA indang security tem dang ken o ashishitsü.

July 31 nü Nuh district nung aütokshi lendong tulu atalokba dak sendakba nung Khan ya Hokolbarnü pua liasü. Iba azütokshi lendong nung nisung trok asü, kong home guard ana aser cleric ka densema liasü aser tangar 88 tashi yiruogo.

Lashkar commander ka tasü mang ngutetogo

New Delhi, Rongjui/September 19 (Agencies): Anantnag district kübok Garol arem nung hopta ka tepeyong joint anti-terror operation ka ayongzüka agiba tembangogo, ta additional DGP Kashmir Vijay Kumar-i Mongolbarnü ashi, ajsüüaka meita aoba sentong maneni benoka inyaksangshitsü ta paisa shisem.

Kumar-i ashiba agi, Hombarnü ngutetba tasü mang ya Lashkar-e-Taiba commander Uzair Khan ta jangjaogo. Ano tanga kiralongrar tasü mang ka nguogo saka tang tashi magiteti lir, ta paisa shisem.

"Tesem balala meita aoba sentong maneni benoka inyaksangshitsü kechiyong ano tesem aika mayimjemi lir, kong blind shells tem raksatsütsü nüngdaker," ta ADG-i ashi.

"Kiralongrar asem monga aliba indang osang onoki angazüka liasü. Onoki kiralongrar tasembuba maneni

bushitsü," ta pai ashi.

Police ketdangsür yagisa, nüburtem dang iba tesemi maotsü metetdaksüogo, kechiyong iba tesem nung mapok aliba grenade aser injangtem alitsü akok.

Police ketdangsürtemi taoba anogo pezü tashi iba inyakyim indang ola madoki aruogo. Parnoki kiralongrar asem rongnung anabo iba arem nung sabanger alitsü ta bilema liasü.

Colonel Manpreet Singh, commanding officer, 19 Rashtriya Rifles, Major Ashish Dhonchak aser deputy superintendent of Jammu and Kashmir Police Humayun Bhat nunger kiralongrartemi tepsetba sülen iba meita aoba sentong ya Bodhbarnü tenzüka liasü. Mezüngbuba anogo khatepba sülen mongui aliba sepai Pradeep indang tasü manga Hombarnü ngutetogo.

Ketdangsürtemi taoba mapang ashiba agi, drone footage ajanga kiralongrartem

jenoka aliba tesem anasa tasü mang ka ronger aliba sayuogo. Security force temi arem mein meita aotsü atema drone aser helicopter tem amshidar. Arem nung longpok amala tejenokdak aika lir, kong kiralongrartem Bodhbarnü nungi jenoka liasü asütsü ta bilemer.

Kiralongrartem nüburtem aliba tesem ajanga jena meyoktsü atema Deobarnü security-i kidanger district Posh Kreeri temeketa dena meketbanga ayu.

Deobarn aonung sentong ka nung o jembiba mapang Lt Governor Manoj Sinha-i, asürtem mang ayangtsü aser kiralongrar nem teyari agütsürtem anema jenjang tesashi agitsü, ta ashi.

Director general of police (DGP) aser Army indang 15 Corps general officer commanding (GOC) densema Kashmir nung temaba jenjang nung aliba ketdangsürtemi iba inyakyim ya asadanga aruogo.



Hornbill Finance Limited
(RBI Regn.No.B.08.00167 Dated 7.11.03)
 CIN: U65929NL2002PLC006840
 Regd. H.Q. Grace Mansion, Tajen Ao Road, Dimapur - 797 112; Nagaland
 Email: hfl.ngl@gmail.com

Hornbill Finance Limited
 Red. Off.: Grace Mansion, Circular road, Dimapur, Nagaland- 797112
 CIN: U65929NL2002PLC006840
 Email: hfl.ngl@gmail.com

NÜBORTEM ASOSHI AROK SANGDONG

NÜBORTEM ASOSHI AROK SANGDONG ya ajanga Companies Act, 1956 kübok dena aliba company aser Reserve Bank of India nung register asüba Certificate Number B.08.00167 dated 07.11.2003 ajanga Non-Deposit taking Non-Banking Finance Company, Grace Mansion, Circular Road, Dimapur, Nagaland- 797112 nung registered office lapoka aliba Hornbill Finance Limited nung share alirtemi company madak kibur aser tashi alibatem item dang ya share yoka melenoktsüner (1) TV Gopinath (2) K K Vijayakumar (3) Rajeevu M A (4) Dr Indira K R aser (5) Tiatemjen K Jamir (parnok ajak dang 'Acquirers' ta ajatsü). Item ketdangser tasenpurtem / shareholder-temi tang aliba shareholders nungi 98% share aginer.

Directors tasen shimtsü purtemji itemi alitsü (i) Shri TV Gopinath, #446, Vishwamanava Double Road, Kuvempunagar, Mysore 570023, (ii) Shri K K Vijayakumar, Kompara, Anickad West PO, Kottayam-686503 and (iii) Shri Rajeevu M A, Manakkunathu House Paduva PO, Mattakkara, Kottayam 686564, and the resigning directors are (1) Chuba Pongen, H/no 009, Grace Mansion, Circular Road, War-09, Supply Colony Dimapur Sad, Dimapur, Nagaland - 797112 (2) Yongya Chingmak, H/No 1053, Block-1, NH-29, Near Woodstock School, Padampukuri Village, Padampukhuri, Dimapur, Nagaland - 797116 and (3) Tiatemen Kezevilhou Jamir, H/no- 247,Block - 3, Chekiye Village, Chekiye, Dimapur, Nagaland - 797115. Tang inyaksangshitsü atema jembiba yagi tanga state-tem nunga company-i business ululoka inyaktetsü. Iba ya ajanga company nükjidong tongtetsüsa ketdangser tasenpurtemi inyaktetsü.

Tekalen agüja aliba sangdong ya RBI Circular NBR, (PD) CC, No. 065/03.10.001/2015-16 dated 9 July, 2015 aser iba sülen agütsüba Regulations nung aliba ama agütsür. Company nem RBI vide letter No.GWH.DOS.ADM.No.S151/01-09-167/2023-24 dated 8 September 2023 ajanga iba tashi aser ketdangsüba maparen belenoktsütsü atema 'no objection' agütsüogo.

Iba ketdangsüba tashi aser maparen melenoktsütsüren nung ya kari danga nunga ta lira, iba onükji shia tezüluba iba sangdong adokba anogo nungi zünga anogo 30 tsüngda Hornbill Finance Limited dangi registered address ajanga yoktsü akok aser kasa shitiji yangi tamalen shisema aliba shareholders tasenpurtem nema copy kaka parnok address mesüra temalen agüja aliba Email ID dangi yoktsü akok. Iba Nüboritem asoshi agütsüba Sangdong ya Company o tamalen shia aliba Acquirers na arok ser agütsür.

Place: Dimapur
Date: September 14, 2023.



For HORNBILL FINANCE LTD.

 Authorized Signatory
 For Hornbill Finance Limited



बैंक ऑफ बड़ौदा
Bank of Baroda

KOHIMA BRANCH
 National Highway 61,
 Kohima, Nagaland- 797001
 Email: kohima@bankofbaroda.co.in

GARITAYOKTSÜ LIR

Bank of Baroda, Kohima Branch-i senotsü teyari agüja M/S. ZAREMO KIKON-i aliba gari/hadir koba senpur dang nungi meyipa agiogo iba ya tayoktsü lir.

Iba gari alitsü jangrartemi gari tsünglong arua asadangtsü aser osang tejangja agitsü atema ketdangsür den tongtepratepletsü. Offer letter den gari atema Earnest Money Deposit (EMD) ama refundable/adjustable Banker's Cheque/DD for **Rs.1,75,000/- (Rupees One Lakh Seventy Five Thousand Only)** bener arutsü nüngdaker. Gari alitsü jangrartemi gari atema offer letter ya envelope ka nung shibanger bener arutsüla aser tema nung "Quotation for purchase of vehicle **No. NL-01/AD-9011**" aser teküboklen shisema aliba gari tenüing zülur alitsüla aser kasa ya **20.10.2023 nü 4:00** ako tashi nungbo ketdangsür ket tongtsütsüla. Shibanger aliba quotations ya **20.10.2023 nü 5:00 PM** nung Bank of Baroda, Kohima Branch nung gari alitsü jangrartem shirnoki offer benokogo, parnok matsüngdang lapoktsü.

Gari alitsü atema takok ngua bidd asüri quotation lapokba anogo sülen mapang inyakba anogo pongu mesüra Branch tekolaki atakzütsüba anogo tashi nung sen ajunga agütsütsüla. Sen magütsüetra pa agüja aliba EMD magi akümtsü aser gari yokatoktsü. Gari/Hadir ya "As is where is" basis nung ayoktsü aser Bank-i atakzüka aliba jenjang tekübok nung mayoktsü. Kuli kecha magütsü offer benokba agizüktsü aser magizüktsü asoshi ketdangsür ket nung tashi lir. Gari ya mapa inyakba anogotem aser Bank lapoka aliba mapang asadanglettsü.

Vehicle Make and Description	Reserve Price
JCB 3DX SUPER 4WD (NL-01/AD-9011)	Rs.17,50,000/-
Engine No.: H00230514	
Chassis No.: HAR3DXSUK02719708	
Year of Manufacture: 07/2019	

Date: 20.09.2023
 Place: Kohima

Branch Head
 Bank of Baroda, Kohima Branch



TIR YIMYIM YIMOBILEM (EDITORIAL)

DIMAPUR RASEMNÜ, RONGJUI (SEPTEMBER) 20, 2023

Asenok Constituency melenshitsü!

Taruba election nung asenoki benshia aruba election yimyabo kasa dang asütsüa akok saka asenok tang aliba pei pei constituency yabo melenshir alitsüsa mapang ka tonga arur. Atangji, makoker dang ashi, asenok ajaki tang tashi benshia aruba election yimya tamajungtem yabo melenshiner saka constituency-bo memelenshiner, kechiyong state ajaklen tang aliba assembly constituency-tem asetshitep nungbo asenokbo constituency ishinba-ang akümtsüa akok. Ajisüaaka, asenoki aginü maginü ta masü, constituency asetshiteptsüba mapang agi atonger, anungji ishinba aküm, teimba aküm ta kecha mali, nütsüng renlokba aser ajemba yari constituency yanglushiba mapaji nübortem asoshi teindang mapa ka asütsü. Ibai linük ajaklen state ajak nung agiba sentong ka lir. Aji oda, tawa Assam nung constituency asetshitepba 'delimitation' mapa ya temogo aser memenui Nagaland aser Arunacha Pradesh na nunga mapa tenzüka aotsü atema 'Delimitation Commission' ka shimtsü osang metetdakja lir. Atangji, Nagaland ama state tila aser nütsüng lakh metsüa majung alidak assembly constituency 60 rongnung 'delimitation' mapa inyaksüba tasak masütsü. Iba maparen inyaksüba ya inyakyim ka lir aser iba inyakyim ajanga akok tashi constituency ka district ka dak tali amsema asütsüsa masütsü aser nübortem senzüsenpong melamelaa sütettsüsa alushi aser lipak repranger ar ladangtsütsü. Atangji, akok tashi tang district shia nung constituency kwi lir, item rongnungjiang asetshiteptsütsü merangtsü saka tanga district nung aliba constituency dang nungi nütsüng 10 % dak tali agi tajembabosa masütsü. Aji oda, 'Delimitation' mapa inyaksü atema district-tem dak mekongshi dang tamasa 2001 küm nütsüng yongsük sükdangba nung Nagaland nung nütsüng kwika sükteta ali, iba nütsüng yongsükji constituency roker agi alemtsü aser constituency shia nütsüng kwika agi akudir, iba kasa nütsüng yongsükji constituency 60 prongla nung alitsüsa asetshiteptsü. Anungji, nütsüng aika aliba constituency nungi nütsüng ajema aliba constituency-i bener aotsü aser nütsüng ishika aliba constituency-temji ana asem ka kuma lokteptsüsa akümtsü. Iba ongoji kodang inyakdangdir, Delimitation Commission mapa metenzükdangyongi koba district nung constituency kwibo asütsü ta asübaaji asenokia metetadoktsü. 2001 küm Nagaland nütsüng yongsük ajak agi 19,90,036 liasü, anungji aji kodang constituency 60 nem lemstüdir constituency shia nütsüng yongsük 33, 167 agi atar, Tetezü, Nagaland nung constituency shia nisung 33,167 alitsüla. Iba inyakyim nungji ajemdaker constituency-tem asetshitep tenzüksü, anungji nütsüng yongsükji constituency shia kasasa mesüaka, constituency kecha nunga iba nütsüng yongsük 33,167 dak nungi 10% agi tajemba mesüra teimbabo masütsüsa inyaksü. 2001 küm Mokochung district nütsüng yongsük 2,32,085 liasü, anungji aji kodang nisung 33,167 nem lemstüdir trokrok dang atar. Aji oda, 33,167 nungi 10% ajemer alemka asünunga anarongdena constituency tenet atatsü. Tetezü, Mokochung district nung tang aliba constituency 10 nungi asem mesüra pezü ajemtsüsa akümtsü. Kasa 2001 küm Kohima nütsüng yongsük 3,10,084 liasü, anungji aji kodang 33,167 nem lemstüdir constituency tuku asütsü aser Dimapur 2001 küm nütsüng yongsük 30,9024 liasü, anungji ajia nisung 33,167 nem lemstüra constituency tuku agi atar. Tanga district-temji khen toktsür, kodang asenoki Mokochung district jenjangji reprangdangdir, Mokochung district nungi luzüka bener aoba constituency asemji Dimapur district nung nung ana aser Chümoukedima district nung ka ta enoktsüsa akümtsüa akok. Atangji, tanübo Mokochung dang masü saka Dimapur aser Chümoukedima district-temjia asen lima amai kümogo. Iba temoatsüji reprangteta, kodang asenoki Delimitation mapa nung ya ochishia shilem agidir, ibaji asenoki anir ano khen Nagaland tasen kuma yanglushiba mapang ka asütsü. Iba tenlaji asenoki Nagaland tajungba ka asoshi agütsütettsüla.

OLEMSABANG

MISSION TO THE NAGAS ASER OKADAK AROGO OTSÜ TEMETEN BUSHIBA

~ Walu Walling & Wati Longchar

(Yashi adok nungi...)

Mission to the Naga

American Baptist Missionary nukjidongji Naga tenem aser China tashi Yisu osang sangdongtsü nukla liasü. Parnok Molungkimong nunger kisung Khristan kümdaktsütsü matu. Anungji "Naga Mission" otsü ya Molungkimong nunger jurila otsü amai dangbo mebilemstüla aser mejenbitsüla. Iba tatalokba ya Naga nunger ajak temoatsü tulutiba rongnung ka lir, kechiaser 1872 küm Naga nunger otsü nung tapak (chapter) tasen ka lapok. Tamangba tasen den Naga nunger modern education bener aruba ajanga Naga nunger alima ajunga den sendaktepa kümdaktsü. Naga nunger ajaki tenung asangtsübaaji tetsü-tebou leptep tsüngtep putu Godhula aser tebuttsü Lucy, aser Dr. Clark, Subongmeren samanir sur kümzüc Naga tenemi anir atuba lidaktsüba ya tesungmangtsü ka lir. Molungkimong nungeri tasü ita Khristan yimsu magizük ka asü nungbo tanü Aor/Naga nunger jenjanga koma lila ta bilemdi aser item tsüraburtem tenung sangdi. Dr. Clark Molungkimong nung mezüng alitsü atudang, parnok koda pelateper alitsü aser ki tasen mesematenzükdang angadi nubu den rongsen ali, aoo, sungküm, tzü, jang, entsü, an, mapo, mendi, melok, nok-nu ajaki tenlar alitsü. Clark, Godhula aser Lucy nunger ajak Ao oshi angazükdaktsür alitsü. Molungkimong nung School tenzüka tanürtem züngdaktsütsübaaji tsüraburtemkoda yongyar alitsü.

Anungji Aor/Naga nunger ajak 1872 küm Godhula aser kinungtsü Lucy, aser Clark Molungkimongi atua arogo tenzüka küm nung ajemdaker Jubilee amongtsübaaji Naga nunger ajak senmang asütsüla. America nunger "Mission to the Nagas" nukla asangsang atalokba aser Naga nubur Khrista ajanga nuchiso bener arutsüba tepela jurila arogotem balalai tamang jenjang tali akhangshitsü aser Tsüngrem sentsüwangshidaktsütsü asoshi jubilee benjong 1872 küm nung ajemdaker mongnura parnokjia temeten kar. Yongji 2022 NBCC aser ABAM iba nungji ajemdaker jubilee monguogo. Iba dak alaka Dec. 22 anogo nung ajemdaker ABAM mission Sunday monga arudagi. Anungji "Mission to the Nagas" ya local arogo kar otsü amai mebilemstüla ta sensaksem aikati lemsatepa liasü.

1872 dak ajemdaker Molungyimsen nunger Jubilee amongtsü temeten lir mali?

Molungyimsen nunger dang masü, Naga nunger ajak amongtsü temeten kar. Temalen shisemba ama, American Baptist Mission nukjidongji Naga nunger ajak aser Naga tenem atener oa China tashi Khristan kümdaktsütsü nukjidong nung Assam mission/Naga mission tenzüc. Historical fact kaji, mezüng tzüsener Clark den teimba ka yim tasen 1876 nung kuma oa tekülem maneni kaa liasü. Tzüsenerba dak ajemdaker Molungyimsen arogo metenzük, saka Molungkimong nung tzüsener aortemi maneni arogo kümteta külema aru. Tetezü, Tsüngremi mapang tatong nung Clark aser Molungkimong nubur den jembia (mepetmesu ajangaa Tsüngremi jembir ta angatetdi) Khristan yimsu tali züindaktsütsü asoshi Molungyimsen 1876 nung kümtet. Saka tamanger ajakbo yimsenbai mai, Khristan dang masü limapura ai. Godhula-a ita ishikabo mai. Anungji Molungkimong arogo disband sutsür aoba küli tejangja mali ta record balala lemsatepba sensaksem kaa liasü.

Dec. 22, 1872 tzüsener tem Molung yim anaprongla nung prokshia liasü ta Molung arogo/yim otsü anaprongla nung jangja jangja küli sayur. 1872 nung Clarki Molungkimong nung arogo ka tenzüc aser ano 1876 nung Molungyimsen kuma yir arogo ka yangji tenzüc ta tejangja küli angur. Molungyimsen nung aliba arogoji tamangertem mezüng tzüsener teloki kümtetba arogo ka asü nung, Tsüngrem nem balaka tushia aguja jubilee amongtsübaaji parnok temeten kar aser shingaia nokdangtsü makok, ABAM ia nokdangtsü makok. Saka Molungyimsen 1876 küm nungang yim aser arogo tenzüc nungji, Molungkimong nung aliba arogo belener ai aser onoka First Baptist Church ta amshia jubilee amongtsübaaji tai ta sabangpur aikati shisem. Ano iba dang sentakba nung ABAM ia tzüsenerba küm nungiang arogo tenzüka küm agitsü ta 1965 Sungratsü mungdang nung lemtetbaama arogo ajak liromedema iba küm nungji ajemdaker Jubilee among nung kanga ajungtsü ta Mungdangi arogotem nem nenshia tanaben metetdaktsü nungbo ajungtsü ta shisa lemsatep.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Laishiba lema agütsüba ya ozüng alema inyakba masü: Justoce Shamim Ahmed

Allahabad, Rongjui/Sept. 19 (Agencies): Laishiba lema agütsüba, tanurtem asoshi shisaliok agütsüba aser tesayuba tajung agütsüba ya Uttar Pradesh indang conversion law anema inyakba masü, ta Allahabad High Court indang single-judge bench kati obendang agütsü.

Scheduled Caste/Scheduled Tribe Act dak sendakba ken o ka special judge kati ketdangsüa amshidang March ita Jose Papachen aser pa kinungsü Sheeja na nem bail magütsüba sülen tenati temepishiba ken o Justice Shamim Ahmed-i lepa reprangshiba mapang iba telemtetba ya September 6 nü agia liasü.

Papachen aser Sheeja nati SC/ST kin nungi nisung kar Khristan yimsü dangi meyiptsü asoshi mesüzük, ta tai tonglokja liasü. January 24 nü tena anema Uttar Pradesh Prohibition of Unlawful Conversion of Religion Act, 2021, aser Schedule Caste and Schedule Tribe (Prevention of Atrocities) Act, 1989 kübok First Information Report (FIR) benokba anogo nungi tena tepuokdak yua lir. UP nung Ambedkar Nagar district nungi Bharatiya Janata Party

züngsem Zila Manti-i ashishiba nung ajemdaker iba FIR ya benoka liasü.

Mesüzüka mesüra danga yimya nung tamangba yimsü melenba ya UP Prohibition of Unlawful Conversion of Religion Act kübok aibelen lir.

Mesüzükba nungya sempet, temolung süa mapa inyakba, sen, mapa agütsüba, tamangba yimsü den sendaktepa aliba kaket reju nung angati shisaliok agütsüba, takum libaliru yimya tajungba kumdaktsüba amala dena lir.

Khristan state ka kumdaktsütsü sentong nung shilem ka ama Papachen aser Sheeja nati tamangba yimsü melendaktsütsü asoshi 'psychological pressure' agütsü aser tim masüba yimyatam amshi, ta prosecutor temi nokdaka arur. Parnoki nüburtem Khristan yimsü dangi melentsü asoshi mesüzük ta tai tonglokja lir. Tamangba yimsü melendaktsütsü asoshi tenük yokba tesem nung aliba nüburtem item yimya yagi tezü danga akum, ta Zila Manti-i maneni tai tongloktsü.

Police temi iba ken o asadangba mapang yimdaklir tem nungi kuli agütsüba nung Papachen aser Sheeja nati shisatsü agi yaritep, Temeshi

Lai lema agütsü, tanurtem shisaliok bushitsü ajungshi aser yi ajemba anema nokdaktsü ajungshi ta temai adok.

Item kuli nung ajemdaker court ajanga UP indang ozüng alema tamangba yimsü melenba ken o kübok item inyakyim ya mesüzükba ta ajatsü metemsür ta angatet aser iba yongji Papachen aser Sheeja asoshi bail agütsü.

Iba ozüng kübok kongshia alirtem mesüra parnok kinunger temi dang ashishitep ken o benoktsü shia lir, ta justice Ahmed-i tuteta ashi. Aser Zila Manti ya ruling party nung züngsem ka asüba kisüng agi pa iba category nung amiter, anungji pai benokba FIR ya menüngdak, ta pai ashi.

UP nung tang yimsü tesüdak BJP ajanga "love jihad" athishia 2020 küm UP legislature temi conversion law ya ozüng kumdaktsü.

Iba Act yagi tamangba yimsü melentsü mechi kibong akumba aitsür. Tamangba yimsü balala süaka kibong akumtsü melaba nung right-wing Hindu telok temi tenokdangba agütsür, aser iba yongji tsürabor tem nungi temelaba liaka Muslim nung teburtem aiben timtem ajurur.

ANOGO ABEN TSÜNGREM DEN

TERENLOK DANGI LENMANG KA

"Ajungben anguba rongsenji ajema akümütsü; saka züsenba agi terara shibai bendendir; pa zünisü." - A. Shin 13:11

Tanü asen lima nung kara-a takar akümütsü asoshi lenmang aisü sayur aser tatsüba ola ayimoktsür. "Iba ama maongka tetibo marutsü' ta shia na mesüzüker. Ajak asoshi lottery nung sen aika chizüktsü, mesüra rongsen aka entoka business tasen tenzüktsü tepuatsü aika dang angur aser nisungtemi ya inyaker. Saka tejashitsü ka, nisung aika item Jamala nung tsüker, taküm tia tamajungba aser tesensakba akümba asenoki angur.

Tanü Lai O ajanga ochi mashiba aser meranga züsentetba tsüngta tebandangji sayur. Hau, ochi mashirji aiben dang yakta takar akümer. Aser iba jenjang atongba nung, parnoki pei sasa senzüka toktsür aser temenen ta-a indang mebilemi inyaker. Ochishia meranga inyaker jibo ashiko, kara-a takar makümütsü akok, saka parnoki parnok kechi aka, iba nung Tsüngrem temoatsü angur.

Iba Lai O ajanga asen rongsen amshiyim nung koda ketdang asütsü, iba indang jangja-a sayur. Ajak nung Tsüngrem sentong kübok jajatsü kanga tongtibang aser iba ajanga dang asen taküm nung Pa temoatsü terenlokba ajangshitsü.

SARASADEM

Kibuba, ni akaba ajak Ne nem bendanga agütsür: Amen

Nigeria nung tamanger 15 tepset aser 32 pua bener ao

Abuja, Rongjui/Sept. 19 (Agencies): Fulani shirur metsürtemi Hokulbarnü (September 15) Nigeria nung Kaduna state south tsütsü tamanger nisung 15 tepset, ta osang ajanga ashir.

Tesüiba küm pezü tsüngta Kaduna state nung iba ama lendong nung pastor 23 süogo aser tekülem ki 200 shibangogo ta osang temai adokba mapang Kajuru County kübok Dogon Noma yimtsüng nung iba lendong ya ataloka liasü.

Tamanger 15 takum samatsüba den külemi ano Khristanpur 32 pua bener ao, ta yangji alirtemi ashir.

"Fulani shurur metsürtem nisung noklang dak tema arua iba yimtsüng ya lungbanga parnoki angur ajak dak akha. Iba lendong ya anepdang 7:00 ako meta atalok. Dogon Noma nung asoshi sarasademjang," ta David Musa-i Morning Star News dang text message ka nung ashi.

Moses Ishaya-ia iba lendong nung par kinunger ana süogo ta ashi.

"Hokulbarnep Fulani shiruru metsürtemi Dogon Noma yimtsüng amakba osang ni temolung shiranga metetdaktsür," ta Ishaya-i text message ka nung Morning Star News dang ashi.

"Iba lendong nung ozü kinunger ana tepset aser tena rongnung ka Karamai yimtsüng nungi adianutsür ka dena lir, shiba Dogon Noma yimtsüng nung kibong akum aser ano ka ya ozü kinunger John Zango'er jala lir."

Pai ashiba agi, iba lendong nung asüba Khristanpur rongnung Bala Laya aser Gimbiya Coaster dena lir. Pua bener aortem rongnung Set Alkali, Saviour Christopher aser Sico Nicholas dena lir, ta ashi.

Iba tesem nung lanur lenir Ernest Maidawa-i sorkar ketdangsur dang tekeraba nung mera agitsü ajungshia liasü.

"Fulani shiruru metsürtemi asendenshir Dogon Noma nung tai maket Khristanpur dak amakba aser tepsetba asoshi onok kanga jashir," ta Maidawa-i Morning Star News dang text message ajanga ashi.

"Ozüng amshirtem dang tekeraba nung iba ama ozü tai maket Khristanpur amakba anentsü asoshi mera agitsü ajungshir. State aser federal level tem nung aliba Nigeria sorkari mapa tali inyaktsüla, kechiaser parnoki takim aser ki o jen kumzüka ayutsüba khuret mabener aser par dak tashi mali."

Mongulbarnü (September 12) Kaduna state nung aliba

Khristan lenirtemi Kaduna yimti nung police ketdangsurtem ajuru aser Muslim Fulani shiruru metsürtem aser danga kiralongrar temi iba ama lendong agütsüba ajanga küm pezü tsüngta pastor 23 tepsetogo, tamanger 215 pua bener aoba tang tashi mechioki lir aser tekülem ki 200 shibangtsüogo, ta shia liasü.

Christian Association of Nigeria (CAN) indang chairman Rev. Joseph Haya baser Local Government Areas 23 nungi Khristan lenirtemi Kaduna State Commissioner of Police Musa Garba aser ano police tanishirtem dang Khristanpur kanga reshikangshir, ta shia liasü.

Khristan lenurtem aser police ketdangsurtem tsüngta iba senden ya Kaduna yimti kübok Albraka Baptist Church nung mena liasü. Khristan lenirtem aser police tsüngta tesendaktep tali tashi itshitsü aser tamanger temi timtem lemsatepba angaa külemi lenmang bushitsü asoshi iba senden ya amen, ta Garba-i ashi.

"Nüburtem kumzüka ayutsü ya sorkar mapa kisüng masü saka ajak mapa lir. Nisung takum aser ki o jen kumzüka ayuba nung sorkari anir inyakdang nisung shia pei

teinyaktsü lir," ta Garba-i Khristan lenirtem dang ashi.

2022 küm tamangba yimsü mechi alima nung Khristanpur timba tepsetba linükji Nigeria ya lir, kong nisung 5,014 tepseta liasü, ta Open Doors indang 2023 World Watch List osang ajanga ashi.

Ano Khristanpur pua bener aoba (4,726), tashiyim amshiba mesüra merenshiba, tashiyim agi kibong akumba mesüra shi aser tekolok timtemdaktsüba nunga Nigeria ya temaba jenjang nung lir, aser tamangba yimsü mechi ki aser shishilempadak tesemtem raksatsüba nungi tema nung lir. Tekülem ki raksatsüba aser linük telung nung timtem balala mechi tesem balala nung tanabuba jenjang nung lir.

2023 World Watch List ajanga alima nung Khristanpur alitsü tamajungtiba linüktem asadangba rongnung Nigeria ya jenjang trok buba nung lir, koba taoba küm jenjang tenet buba nung liasü.

"Fulani, Boko Haram, Islamic State West African Province (ISWAP) aser danga telungpur temi Khristanpur aliba tesem amaker, tamangertem tepseter, tetsüngtepen alok-alatsür, tashiyim amshia shi nung medemer aser

rongsen agi alangdaktsütsü meshia pua bener aor mesüra alar ama ayur," ta World Watch List ajanga ashi.

"Taküma linük south tsütsü Khristanpur timba aliba tesemtem nung azüdokshi ya maneni lir... Nigeria sorkari tamangba yimsü nung ajemdaker reshikangshia mamshir ta maneni tekong meranga nokdaker, anungji Khristanpur temeden nung aitsüba memerenshi yutsür."

Nigeria aser Sahel nung Muslim Funali nungertem timba lir aser parnok ya kin-kidong noklang aika lir aser balala nungi jakzük aser item Fulani nung kari Islamist ideology retreat amshitsü meranger, ta United Kingdom indang All-Party Parliamentary Group of International Freedom or Belief (APPG) ajanga 2020 report nung shia liasü.

"Parnoki Boko Haram aser ISWAP den mesüktepa tasa amshir aser Khristanpur dak tenük yokba tejangja sayur," ta APPG report ajanga ashi.

Khristanpur meyong ali tashiyim amshia rakzüktsü aser Islam yimsü amangdaktsütsü nükjidong nung shiruru metsürtemi Nigeria indang Middle Belt nung Khristanpur dak amaker, ta Nigeria nung Khristan lenirtemi ashir.

**AO OSHI ANGAZÜKDAK:
TANÜ ANGAZÜKTSÜBA OJANG**



Salem

(v) pelaba tamaitüsü teka amtepba, pelar ta ashiba (greetings)

* Khristan purtem ajurutepdang salemtepa salem o ashir.

Salepsari

(v) tagidak maka o jembia asayaba (indecent talk and behaviors)

* Salepsari asüba nisung dak temoatsü mamonger.

OLONG PAITEP # 6642

1					2				3
							4		
5		6			7				
8									9
							10		
				11	12				
		13							
14					15				
				16					

TIPLÉN

- O jembitsü tashi - 8
- Süngjang tapu ka - 5
- Tekanük nung enokba - 5
- Teka amtep - 5
- Tzük asendak - 5
- Tsünpang tema aliba - 5
- Ken atenba yimya - 5
- Asangur - 8

LANGTSÜNGLEN

- Tepok telung nung shilem ka - 7
- Tamajung aküm - 5
- Chi den külemi achiba - 3
- Meimchir alimai aruba - 3
- Laishiba nung ayong ka - 4
- Tarutsü nükla - 7
- Tamendakdak/Nükjidong - 4
- Tenük-telen mejungi aküm - 5
- Terok nungi adokba - 3
- Meimchir telemsa - 3

OLONG PAITEP # 6641 TELANGZÜBA

TIPLÉN :

- Taa, 3. Teküm, 6. Aibelen, 7. Aut,
- Ajizük, 10. Ojala, 11. Semer, 13. Sen,
- Kioktsü, 17. Itsük, 18. Kar.

LANGTSÜNGLEN :

- Tai, 2. Asensor, 3. Tanü, 4. Kua,
- Mitsüktsü, 6. Azübenshi, 8. Lah,
- Jangkok, 12. Akok, 14. Nashi,
- Sür.

Happy Birthday

Tenüng : LANUSANEN IMSONG.
Tasoba : 20th September, 2012.
Küm : 11
School : First Bloom Montessori School.
Talidak : Longkumendang Ward, Tuli Town.
Happy Birthday Sanener, Alimai na tebur chanu ka ta züngshir, saka onok asoshi na ji alima. Taküm aliba Tsüngremi na arishi talang, shisatsü tajung aser anema lidakjang ta sarasademtsür.
-Temeimertem.

Tepela Tasoba Anogo

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

- Tenüng :
- Tasoba anogo:
- Küm : 4. Class :
- School :
- Talidak :
- Salem osang :



MGNREGS kübok Mokokchung district atema Social Audit District Level Public Hearing tanabubaren (2nd Phase) 19th Sept. 2023 nü DRDA Conference Hall, Mokokchung nung akadang tangokba noksa nung angur. Iba sentong nung lmyapangla, Program Officer (MGNREGA), DRDA, Mokokchung; Vepo Keyho, State Resource Person, NSSAA, SAU, Nagaland; Yanathung Odyuo, Block Resource Person, NSSAA, SAU, Nagaland parnoki shilem balala agia liasü aser Independent Observer-ji Abeinuo Jasmine Ashao EAC (HQ) Mokokchung liasü. Mokokchung, 19th September, 2023

Manipur nung lanur 5 apuba anema ghonda 48 mokdang

Imphal, September 19, 2023 (Agencies): Manipur nung lanur pungui prangpong bener aser army uniforms agir lia apuba chiokang ta takhangba agüja Meira Paibi den local club pungui takhangba agüja Imphal Valley ghonda 48 mokdangtsü ayongogo.

Mongulbarnep Imphal Valley nung shishilembadak ajak shibang aser lenmang nunga gari kar dang senzü.

Tanü class 10 board exams indang supplementary examinations agitsüba liasü

saka mokdang ajanga tatidang thinena liasü. Board of Secondary Education, Manipur-i yakta tatidang agitsü anogo osang metetdaksütsü.

Hombarnü Meira Paibi temi Imphal East district kübok Khurai aser Kongba, Imphal West district kübok Kakwa, Bishnupur district nung Nambol aser Thoubal district nung lenmang kar mokdang lanur pungu chioktsü takhangba agitsü.

September 16 nü Manipur Police-i mita aodang nisung pungu ket nung prangpong

tajungtem bona aliba apu aser parnok ya camouflage uniforms agir liasü.

Ajisiüaka, lanur pungu apuba sülen nisung aika Porompat Police Station kima nung adenshir lanur pungu chioktsü takhangba agitsü aser parnoki Police Station nungpoka atutsü merang.

Iba tensa aziüoktsü atema joint security forces-i tenük amdaksüba mokozü amshitsüsa aküm aser idanggi Rapid Action Force (RAF) personnel ka dena nisung ishika yiru.

CM Pema Khandu-i Donyi Polo Prayer Centre lapoktsü

Itanagar, September 19, 2023 (Agencies): Arunachal Chief Minister Pema Khandu-i September 18 nü Upper Subansiri district kübok Kuporijo nung Donyi Polo Khumko Naam (Donyi Polo Prayer Centre) lapoktsüogo.

Iba sentong nung jembidang CM Khandu-i lisopurtem dang sobaliba den tesentaktep tajung ayutsü tayongzükba agitsü

Nisung ka taküm nung terenlok ya tongti shilem ka lir saka lisopurtemi pei tera mamadoktsüla aser sobaliba o inyaksangshi ajungkettsüla, ta pai ashi.

"Asen oshi aser sobaliba

ajanga asen maitsü agitsür, anunggi tanur ajaki angazüktsüsa lisopur oshitem sapua jembitsüla" ta CM Khandu-isa metetdaksü.

CM Khandu-isa 'nyibus' (shaman) ajanga Tani kintem sobaliba aser inyaksangshi wazüka ayuba atema teütsang agitsü aser pelaba metetdaksü.

"Nyibus ya tematiba jenzang nung ayutsü kechiyong sobaliba inyaksangshi aser benjung ajak parnok dak dang keta lir. Parnok melira asen lisopur külemküja meperitsü" ta paisa ayongzük.

Khandu-isa nübertem dang pei pei kidang tekülem agitsüba

tesem kaka ayutsü indang ashidang par Monpa kin indang tatishitsü ka ashi.

"Monpa nungter takar mesüra sensaker kibong süang pei pei kidang tekülem agiba tesem lir. Iba ajanga yimjung aser tepela angur" ta pai ashi.

Sorkari akokba tashi asen lisopur sobaliba aser inyaksangshi wazüka ayutsü meranger saka lisopurtem dak tulu ka keta lir ta CM Khandu-isa shisem.

Paisa nübertem dang tamangba yimsü balala memedangtsü saka tamangba yimsü ajak akhümtsübuttsü mepishia metetdaksü.

NEHU campus nung raratepdang kaketshir aika yiru

Shillong, September 19, 2023 (Agencies): Shillong nung aliba North Eastern Hill University (NEHU) campus nung raratepdang kaketshir aika yiruo.

Hombar aonung 10:00 ako meta iba lendong ya atalok. Kin balala nungi kaketshirtem raratep ta osang angazüker.

Kaketshir telok kati NEHU nung Hostel 19 meketbangba sülen rara adok. Idanggi kaketshirtemi lung agi aondang

kichiba aser gari windshields aika raksatsü.

Ajisiüaka Mawkyroh police outpost nung police telok ka NEHU campus-i aoba sülen tensa aziüoktet.

Külen, Rangirra Hostel (Hostel No. 19) nung alirtemi Mawlai Police Station nung FIR ka benokogo.

September 18 aonung 9:40 meta Rangirra Hostel, Shillong nung lendong atalok. Tanga

hostel nung alir kaketshir 40-50 shi kati temelaba kecha magii Hostel number 19 nungpoka atu ta FIR nung shia lir.

Kaketshirtem jagi hostel telung nung osettsüsettem aser kichibatem raksatsü aser hostel nung alirtem dak lung agi aon ta FIR nungsa shia lir.

Iba mapang parnoki non-Khasi kaketshirtem dak tenük yoka tashiyim mapa inyaka ta FIR nung shia lir.

GOVERNMENT OF NAGALAND
DIRECTORATE OF INDUSTRIES & COMMERCE
email: industrynaga@gmail.com dirindus-ngl@nic.in
www.industry.nagaland.gov.in
ADVERTISEMENT

NO.IND/DEV/SA/78/95 (VOL-II) **Dated, Kohima, the 14th Sept. 2023**

NO.IND/DEV/SA/78/95 (Vol-II): In continuation to our previous advertisement of even No. dated 17/08/23 the submission of applications in the field of Textiles (Loinloom Textiles) & Handicrafts is extended to 30/09/2023.

Interested Indigenous artisans of Nagaland are hereby invited for State Level Award 2023 in the field of Textiles (Loinloom Textiles) & Handicrafts. Only genuine artisans above 18 years of age engaged in the field for the last 5(five) years & above may apply for the State Level Award. The application form may be collected from the Directorate of Industries & Commerce, Development Branch, Room No.34 (1st floor), Kohima Nagaland on any working day. The application can also be downloaded from the website www.industry.nagaland.gov.in

Sd/-
A. TemjenJamir
Director of Industries & Commerce.

Germany-i neo-Nazi telok ka nem tenokdangba agütsü

Berlin, Rongjui/September 19 (Agencies): Germany sorkari Mongolbarnü neo-Nazi telok Hammerskins Germany nem tenokdangba agütsüba den iba telok nungi züngsemtem ki meitaogo.

Iba telok ya American ring-wing extremist telok ka nungi jakzükba lir aser Europe kübok linük balala nung tongtibang shilem agir.

Hammerskins Germany ya Hammerskins Nation nungi jakzükba lir, koba United States nung 1988 küm tenzüka liasü, ta interior ministry-i ashi.

Iba telok yagi Europe nung right-wing extremist inyakyim nung tongbibang shilem agir. Alima ajunga nung iba association züngsemtem yagi parnok dang "brothers" ta ajar aser parnok ya elite "brotherhood" ka ama züngshir. Iba telok yagisa parnok ya right-wing extremist elite ama züngshir,

ta ministry-i ashi.

"Hammerskins Germany nem tenokdangba agütsüba ajanga organized right-wing extremism nem tetsükdaksü tulu agütsüogo," ta Interior Minister Nancy Faeser-i ashiba den tenokdangba agütsüba nung association indang regional chapter tem aser sub-organization Crew 38 densema lir, ta shisem.

"Iba tenokdangba agütsüba ajanga onoki international jenjang nung mimchir-i mebenschitsü yimya benschia inyaksangshiba neo-Nazi association ka Germany nung tembangtsüogo. Iba ajanga racism aser anti-Semitism anema osang tejangja ka agütsür," ta lai ashi.

Germany nung iba telok nung züngsem 130 shi lir. State 10 nung police temi iba telok nungi züngsem 28 indang ki meita oa liasü. Police temi züngsem kar danga apu mapu iba indang

osang tejangja memetet.

Tenokdangba magütsü tsüngda German federal aser state sorkartem tsüngda küm ka dak tema teka amteper inyaksangshia aruogo, ta Faeser-i ashiba den onoki America dena inyaksangshia aruogo, ta ashi.

Iba telok indang ideology tongtibangtibaji Nazi ideology dak ajemdaker racial doctrine ka prokshia yoktsü asoshi lir. Association Hammerskins Germany nükjidongji alima ajunga nung right-wing extremist tashi taitba kümdaktsütsü asoshi lir aser talisa parnok kentenba sentongtem ajanga iba telok nung züngoksema malirtem anioktsü meranger, ta ministry-i ashi.

Hammerskins Germany nem tenokdangba agütsüba densema German interior ministry-i, right-wing extremist association 20buba nem tenokdangba agütsüogo.

Pakistan meshitsüyadang India ita tongogo: Nawaz Sharif

Islamabad, Rongjui/Sept. 19 (Agencies): Linük nung mepetmesü adoka aliba asoshi taoba Pakistan ato kilonser Nawaz Sharif-i taoba Pakistan army chief General Qa,ar Javed Bajwa aser taoba itdangiter tekolakba Fazi Hameed tenting asen.

"Tanü India ita tongogo, India nung G20 senden menogo, aser Pakistan bo linük balala dang sen meshia senzür," ta Nawaz Sharif-i ashi.

Sharif-i India indang rongsenketzüng ainba tushi aser Pakistan den medemdang aser Pakistan ato kilonser ya aoso bener Beijing aser Arab linüktem sema senotsü meshitsüya senzür ta ashi. Pakistan ya sentsüh memonoktetba linük ka takumer, ta pai sasaba shia liasü.

Taoba Pakistan army chief General Qamar Javed Bajwa aser taoba itdangiter tekolakba aser Inter-Services Intelligence indang director genera, Faiz Hameed na ya taoba ato kilonser Imran Khan-i bhukuma

liasü.

Khan ato kilonser inyakba mapang Bajwa kümsük atsülanga liasü aser 2018 election nung Khan-i takok angutsüsa tasa yanglu ta tai tongloktsü aser Imran Khan mapangsa Hameed ya DG-ISI shima liasü.

Pakistan nung election tsüngtsüng atemba mapang lir aser Nawaz Sharif ya linüki meyipa shilangtsü meranger. Pakistan nung election ya mangatetep aliba maparen ka kumogo, kechiaser election anogo latettsü asoshi judiciary, legislature aser executive atsütepba mapang lir.

August ita Election Commission of Pakistan-i election ya January 2024 nung agitsü akok ta shia liasü, saka Pakistan Tir Arif Alvi, shiba Imran Khan'er Pakistan Tehreek-e-Insaf (PTI) party nungi lir, pai election ya constitution nung mela aliba ama November ita agitsü ta ashir.


National Assembly ya

anojungi anenba asünung, election ya anogo 90 tsüngta agitsüla, ta Constitution of Pakistan nung shia lir. Danga mapang assembly kümsük tembanger anogo 60 tsüngta elections agir.

Pakistan Muslim League (Nawaz) (PML-N) chief Nawaz Sharif ya temang majungba mechi November 2019 nungi London nung jenoka alir.

Pa ya 2017 küm Pakistan Supreme Court ajanga ato kilonser inyaktsü metemsü kumtsü aser yimten nung tetsüng majemoktsü tenokdangba agütsü aser ao Panama Papers temai adokba nung Supreme Court ajanga totuyuba agütsür bushisüngdangba nung Dubai nung amenoka aliba par jabaso Hussain Nawaz indang firm nungi sen aazükba miimbanga ayuba nung pa aibelena aliba jangjateta arishi tepiyong yimtenren nung tetsüng majemoktsü 2018 küm tenokdangba agüja liasü.

MOLUNGNEN O



16th Nov 1945 - 11th September 2023

Obala Lt. Chubawati Kichu (Aliba) mapang talangka shiranga arur asüba mapang tashi kija, kibong aser lokti tentet kwikati ozü den yaritepogo, nenok ajak dang ozü temolungjang taroktiba nungi pelaba lemsateper.

Ozü timtem nung alidang nenok sarasadem, shisatsü, nübu aser rongsen den ano yimya balala agi yaritepba ozü tebang agi meshitet. Doctors, nurses aser ano nisung aikati ozü dang kanga meima yaritepogo. Nenok ajak dang tsüngtong arua pelaba meshitetaka nenok temeim ozü temolung aser sarasadem nung teti alitsü.

Tulusang Tsüngremi nenok ajak mulamoshia moajangma.

~ Kinunger aser Adianutem

DVERTISEMENT FOR THE POST OF HEAD ACCOUNTANT (HA)

The Clark Theological College (CTC) hereby invites applicant for the post of Head Accountant (HA) in the Finance Department at CTC.

Basic Criteria:

- " He/she must have a minimum qualification of graduate/master degree in both Commerce and Management.
- " He/she must have a strong Christian commitment to serve the College.
- " Preferably, he/she must have some years of work experience in the relevant field.

Interested candidate can submit their application on or before 30th January 2024 by post to:

The Principal

Clark Theological College

Aolijen, Mokokchung-798601, Nagaland, India

Or Email to - ctcprin@gmail.com

For any queries kindly contact:

Principal, CTC - +91 8837002616/ DDO, CTC - +91 7005860469

Sd/-

Prof. Rev. Dr. A. Temjen Jamir

Principal, CTC.

OFFICE OF THE MEKÜLI VILLAGE COUNCIL MOKOKCHUNG: NAGALAND TENÜNGSANG AGÜTSÜR

Lt. Merentoshi aser Lt. Yapanglemla (Meküli) na jabaso Mr. Bendangaküm-i Icon Kung-fu 4th Dan, Karate 3rd Dan Kung-fu National Gold Medal, Open Martial Art's National Gold, Muaythi International Player, takok jenjang tajung nguteta yimer nem konang tulu bener arutsüba atema tenüngsang aser tetushi agütsür. Tsüngremi maneni ne taküm sempet aser wadang moajangma.

Ano iba den külemi National Sports day 2023 nung sentong tajung ayongzüka katsüba atema Nagaland University dang pelaba lemsateper.

Sd/-

Toshilemba, Chairman
Meküli Village Council

Sd/-

Imliwapang, Secretary
Meküli Village Council



Batam asetkong, Indonesia nung aliba Batu Ampar Port nung ASEAN Solidarity Exercise nungja agütsüba military non-combat exercise tenzüka mapang mitkartem Indonesian Navy hospital ship KRI dr. Radioman Wedyodiningrat anasa noksaka aliba noksa nung angur.

Mkg. nung Imchaba Master Memorial Nagaland Open Volleyball Trophy 2023 asayadagi



(Abelen) Mokokchung nung Imchaba Master Memorial Nagaland Open Volleyball Trophy 2023 tenzükba sentong nung Inaugural Patron Rahul Gurung, Kirti Chakra, Commandant 12 Assam Rifle, Mokokchung aser trophy acaayangertem külemi tangokba noksa. (Achiji) Mokokchung nung Imchaba Master Memorial Nagaland Open Volleyball Trophy 2023 tenzükba sentong nung mezüngbuba asaya Spartan Club, Lakhuni, aser Chienino Brothers, Kiruphema asayartem den Inaugural Patron Rahul Gurung, Kirti Chakra, Commandant 12 Assam Rifle, Mokokchung-i metetpela salem asür, iba asaya Chienino Brothers, Kiruphema teloki 25-16, 25-22 agi koka tembang.

Mokokchung, Rongjui/September 19(TYO): 16 Buba Imchaba Master Memorial Nagaland Open Volleyball Trophy 2023, September 19 nü Multi Sports Complex Mokokchung nung tenzükogo.

Iba Trophy nung Spartan Club, Lakhuni, Chienino Brothers, Kiruphema, Changtongya Volleyball Association-A, Tongden Club-B, G-Sports, Mokokchung, Everygreen Club, Ungma, Fazl Ali College, M.H-10, Kohima, Kumlong Sports Association,

J.N Aier Memorial Club, Yajang C, Ozümi Volleyball Team, United Changki, Rongpang Club, Tsürangkong, Archippus Club, Dimapur, Longsa Sporting Club, Peren District Volleyball Association Tongden Club-A Kumlong Ward aser Changtongya Volleyball Association-B ta ajak agi team 19-i shilem agidagi aser iba Trophy September 22 nü tembangtsü.

Iba Trophy nung Champion-i Running Trophy den sen Rs.80,000 agizüksü, tanabuba jenjang ajangzükeri sen

Rs.50,000 den certificate agizüksü, tasembuba jenjang ajangzükeri sen Rs.30,000 aser Pezübuba jejnag ajangzükeri sen Rs.20,000 agizükba den Best Spiker, Best Setter, Best player of the Tournament-i jurila senpet sen Rs.5000 kija shia-i agizüksü

Tanu iba trophy tenzükba sentong nung Inaugural Patron Rahul Gurung, Kirti Chakra, Commandant 12 Assam Rifle, Mokokchung-i jembidang asayartem kwikati iba asayamung nung tendagi nenok ajaki kenü anogobo

Mokokchung district aser State tenung nung dang asayatsüba masü saka India linük tenung nung asyatsü mangdang nung asaya-angta shilem agir asayartem ajungshia ashi.

Rahul Gurung-isa Volleball asaya ajanga nüburtem talisa Volleyball asayartem anitetsü tanagetba tulu nung iba Imchaba Master Memorial Nagaland Open Volleyball Trophy katetsüsa rongsen tulu aguja nungitbaji tangatba tulu aser mapa kangasa tajungta Imchaba-er kibong aser

kinungertem tenung sanga ashi.

Dr.T.Ao ajanga alima nem Mokokchung tenung ajungketja metetdaksüogo yamaji na ajanga Mokokchung tenung ajungkettsüsüsa iba Volleyball asayaba nung temelung aguja mangdang tajung akatsülata asayartem ayongzüka jembi.

Sentong nung tarur pela agizüka Organising Committee Convenor Lakhi Longkumer-I jembi aser sentong nung Tsüngremer lenisüba meshia sarasademba den Pretty Tzüdir ketdang süba nung iba sentong agi.

NSF Trophy: Mima FC aser Asofii FA nati takok angu



Kohima, Rongjui/September 19 (TYO): Indira Gandhi Stadium, Kohima nung tang asaya aliba 23buba NSF Martys' Memorial Trophy nung Mongolbarnü Mima Football Club aser Asofii Football Academy Manipur nati pei tata asaya kokogo.

Mezüngbuba asaya nung Mima FC-i goal 2-1 agi Youngster FC madak takok

ngua liasü. Asaya nung mezüngbuba goal ya Mima FC nungi asayar Neitho-u Shunyü (13)-i minute 14buba nung idaktsü. Break sülen asaya tanabuba shilem nung Youngster FC atema Akhrietuo (17)-i goal ka idakja team anaprongla goal kasasa akim, ajisüaka Khriesamhalie Ngukha (7)-i minute 75buba nung Mima atema tanabuba

goal idakja parnoki asaya akok.

Iba asaya atema player of the match naroküm Mima FC nungi asayar Khriesamhalie Ngukha nem agüja liasü.

Tanabuba asaya nung Asofii Football Academy-i goal 11-0 agi Samaritan FC koka liasü.

Asaya nung Asofii FA nungi asayar P. Sorormi Thingsong-i hat-trick ana idaktsüba atema Man of the Match naroküm agüja liasü. Asaya nung Henjakhup Haokip Wunshungan Jagoi, Elozuo Kayina, Lolaru Kaisii Phimu aser Lamgumlal Kigpen nungeria goal kaka idakja liasü.

September 20 nü asayatem:

1. Medziphema Royal FC vs Fixate @ 11:30 AM
2. Patkai Christian College vs Pro_D FC @ 1:30PM.

Rifle shooter Nischal-i Rio World Cup nung silver angu

Rongjui/September 19, 2023 (Agencies): India tsür Nischal-i, Rio De Janeiro nung ISSF World Cup nung tetsür 50m Rifle 3 Positions nung shiver medal nuogo.

Hombarnü asayamung tatemangbuba anogo lai India asoshi tanabuba medal ngua liasü. Lai iba asaya nung takok ngutetba ya tenüng asangtsü langa lir, kechiyong iba asayamung ya la asoshi mezüngbuba senior World Cup liasü.

Lai final nung point 458.0 nguteta Norway tsür Jeanette Hegg Duestad sülen tanabuba jenjang nung tembanga liasü.

Duestad ya reigning Air Rifle European Champion aser 300m 3P World Champion lir aser lai tang tashi nung gold medal pongu densema ISSF World Cup medal 12 ngua lir. Tokyo Olympics nung la pezübuba nung tembanga liasü.

Nischal-i anogo tepeyong kanga junga asaya aser Women's 3P nung qualification national record tasen ka yanglua liasü.

"Ni tang mezüngbuba world cup final nung asayaogo aser ni medal ka nguogo anungji ni kanga pelar," ta lai ashi.

Elimination round nung lai point 587 ngua ayong ayonga qualify asü. La den külemi India

tsür Anjum Moudgil aser Ayushi Podder nata qualify süa liasü.

Qualification nung Nischal-i point 592 ngua Anjum-i taoba küm Cairo nung President's Cup asayaba mapang point 591 ngua otsü tasen yanglur aliba ajateta liasü.

Final nung Duestad den ano qualification topper (594) aser world champion China tsür Wanru Miao, Denmark tsür 2018 Youth Olympic champion Stephanie Grundsoe, Italian Olympian Sofia Ceccarello aser senior Polish shooter Aneta Stankiewicz nungera densema liasü.

OCK nung 5buba Open Basketball Tournament tenzükogo

Kohima, Rongjui/September 19 (TYO): Oriental College Kohima-i ayongzüka 5buba Open Basketball Trophy, September 19 nü D. Khel Council Kohima Village chairman aser Nagaland Contractors & Suppliers Union tir Pele Khezhe-i campus nung tenzüktsüogo.

Ajak senteper iba asayamung nung team 10-i shilem agidar. Asayamung akokba team nem senpet sen 50,000 agütsüsü aser tanabuba jenjang nung tembanga team nem 30,000 agütsüsü. Maneni Most Valuable Player nem senpet sen 5000 agütsüsü.

Asayamung nung shilem agia aliba team tem rongnung South Side Shooters, Oriental College Kohima, Stallion, Kryptonite, Kohima Village Students' Union, Kohima Highlanders, Team Taurus, Orea, Arrow Farm aser Hard Knock densema lir.

Alakteta jaoker ama asayamung lapokba sentong nung o jembiba mapang Khezhe-i ashiba agi, basketball asaya ajanga sobaliba, tamangba aser jenjang balala nungi adenshia nüburtem ka kuma longjemdaksür.

Iba asayamung ayongzüka agiba atema College nem tenüngsang agüja pai, iba asayamung ya telongjem aser tashi temaitsü lir, koba nükjidong ka asoshi longjemer inyakba ajanga adokdaksütsü ta ashi.

Asaya ajanga nisung ka taküm libaliro azüoktsü aser maneni temlungtetba tulu nung inyaksangshitsü angazüker, koba pai ashiba agi court nung dang masü saka nisung ka taküm nung tetsükdaksütem kokyetyonga aotsü asoshi tashi ka lir ta ashi.

Khezhe-isa, sentepa aliba lokti dang takokertem nem dang masü saka asayamung nung shilem agir ajak nem tenüngsang agütsüsü ajungshia liasü.

Sentong nungsa OCK HoD Department of History, Tumben Nnullie-i okila jembia liasü. Iba sentong ya Rovisienuo Nagi lenisüba nung agi aser Akhrienuo Yhor-i Tsüngrem temaotsü meshizüka sarasadema liasü. Maneni sentong nungsa Vizotuo Thorie lensüba nung asayartem tenangzüktepba agi aser OCK Girls Hostellers temi ken tajung ka tena liasü.

BILEMDANGANG

"Nai kechi akoktsü ta bilemer aji dang koktettsü."